



Associacion Internacionala  
d'Estudis Occitans

XI<sup>en</sup> Congrès Internacional  
Lhèida, 16-21 de junh de 2014  
Universitat de Lhèida

XI Congrès Internacional · Lleida, 16-21 de juny de 2014 · Universitat de Lleida

## Segonda circulara

Cars amics / cars collègas,

L'XI<sup>en</sup> Congrès de l'AIEO comença de prene forma. Pel comitat d'organizacion, aqueste Congrès es simbolic. 2014 es una annada emblematica per Catalonha (1714 ne borrolèt radicalament l'istòria), mas lo moment es egalament estrategic perque i festejarem l'anniversari d'eveniments màgers coma la Batalha de Murèth en 1213, l'autreg de la Querimònia als araneses a Lhèida en 1313, lo Tractat del Plan d'Arrem en 1513 e l'oficializacion de l'occitan dins la Val d'Aran en 1990 (qu'aurà vint e cinc ans en 2015). A l'escasença d'aquelas commemoracions, nos regaudissèm enòrmament d'aculhir dins nòstra universitat d'especialistas dels estudis occitans.

La principalas institucions de nòstre territòri sostenon amb estrambòrd lo Congrès de l'AIEO de 2014, en començar per nòstre govèrn, la Generalitat de Catalonha, a través de son Departament de la Cultura. D'un autre costat, podèm pas tanpauc desmembrar l'importanta ajuda portada per d'institucions coma lo Conselh Generau d'Aran, la Deputacion de Lhèida e son Institut d'Estudis Ilerdencs, l'Institut d'Estudis Catalans, l'IVITRA de l'Universitat d'Alacant o encara de la quita Universitat de Lhèida, qu'es plan conscienta de la plaça que deu aver l'occitan en Catalonha, ont es istoricament la segonda lenga territoriala del país. Podèm pas tanpauc daissar de caire la collaboracion dels grops de recèrca o ben del Consorci del Turó de la Seu

Vella, que farà que nòstres congressitas pòscan vesitar lo monument mai important de la vila de Lhèida e un dels mai importants de l'occident catalan. Pr'aquò, volèm pas desmembrar degun: nòstres partenaris e collaboradors son totes indispensables. Es per aquò que vos convidam a consultar la lista dels que sostenon lo Congrès en clicant sus aqueste ligam: <http://aieo2014.blog.cat/partenaris>.

D'autres organismes o institucions, que son pas encara recensats sus la lista, seràn anonciats al bon moment. Pro lèu que publicarem tanben los membres que compausaràn lo comitat d'onor del Congrès, constituït per de representants publics al pus naut nivèl, que fan mòstra de lor interès per la promocion e pel desenvolopament dels estudis occitans. Se prevei una presentacion oficiala de l'XI<sup>en</sup> Congrès de l'AIEO e un acamp de son comitat scientific lo 18 d'octòbre de 2013 dins lo sèti del Departament de la Cultura a Barcelona, amb la preséncia de l'Onorable Sénher Ferran Mascarell i Canalda, Conselhièr de la Cultura del Govèrn de Catalonha.

**Ja vos podèm presentar lo programa** que vos permetrà de conèisser lo desenvolopament de l'XI<sup>en</sup> Congrès de l'AIEO: <http://aieo2014.blog.cat/programa-provisori-2/>. Podètz causir de descargar lo resumit del programa o ben lo programa complet. Aquí dedins, i trobaretz la conferéncia inaugurala e las conferéncias plenièras, las taulas redondas, l'emplec del temps del Congrès, de pichòtas descripcions de las activitats complementàrias previstas per cada jornada (de cinèma o de teatre, de concèrts, de vesitas culturalas, l'excursion, lo banquet...) e d'autres informacions interessantas. De tot biais, cal dire que lo programa pòt èsser subjècte a de cambiaments (pasmens limitats). Los títols e los resumits de las comunicacions, tant coma las seccions definitivas del Congrès, se publicaràn al moment de la sortida de la tresena circulara.

**Podètz mandar de proposicions de comunicacions abans lo 30 de novembre de 2013** (<http://aieo2014.blog.cat/proposicions-de-comunicacion/>) a l'adreïça electronica seguenta: [ceo@filcat.udl.cat](mailto:ceo@filcat.udl.cat). Dempuèi lo 1<sup>er</sup> de setembre, **vos podètz tanben inscriure al Congrès en remplissent lo formulari** que trobaretz sus nòstre sit Internet (<http://aieo2014.blog.cat/inscripcion/>).

Vos prepausam de presentar de comunicacions suls aisses següents, que vos avèm ja detalhat dins la primièra circulara:

1. Occitan modèrne
2. Occitan ancian
3. Literatura occitana de l'Edat Mejana
4. Literatura occitana modèrna e contemporanèa
5. Las politics linguistics de l'occitan
6. La Catalonha occitana e l'Occitània catalana. Occitan e catalan

## 7. Cultura occitana

Per mai d'entresenhas sul Congrès, vos recomandam de consultar nòstre sit Internet, que las informacions i son regularament actualizadas, o ben de contactar l'organizacion.

Vos esperam nombroses a Lhèida.

Plan corlament,

Lo comitat d'organizacion

<http://aieo2014.udl.cat>